

Siunnersuut uunga: Ilageeqarneq pillugu Inatsisartut inatsisissaattut siunnersuut

Kapitali 1

Ilageeqarneq, upperisaq nassuerutiginninnerlu

§ 1. Ilagiit lutherikkuusut (Kalaallit Nunaanni Ilagiit) oqaluffiat tassaavoq Kalaallit Nunaanni ilagiit naalagaaffiup tapersersugai.

§ 2. Kalaallit Nunaanni Ilagiit Naalagaaffeqatigiinnerup iluani ilagiinnut naalagaaffiup tapersersugaanut ilaavoq, Namminersorlutik Oqartussat ataannilluni, tassanngalu tapersersugaalluni.

Kapitali 2

Ilageeqarnermut pingaarnertut akisussaaffik

§ 3. Naalakkersuisut Ilageeqarnermi pingaarnertut akisussaasuupput, taakkulu pillugit aalajangersagassanik Biskoppi isumaqatiginiarlugu aalajangersagaliorsinnaallutik.

Imm. 2. Biskoppi isumaqatiginiareerlugu immikkut ilisimasalinnik inuttaqartunik ataatsimiitidianik pisariaqartitsineq malillugu Naalakkersuisut pilersitsisinnaapput.

§ 4. Naalagiartarnerit ilagiinnullu tunngasunik suliaqarnerit pillugit Biskoppi isumaqatiginiarlugu aalajangersagassat Naalakkersuisut aalajangersassavaat.

Imm. 2. Naalagiartarnermi ileqqorisassat ritualit, tussiutit aamma tussiutit tapiisa akuerineqarlutik atortussanngortinnejarnissaat pillugit Naalakkersuisut Biskoppip innersuussutaa naapertorlugu aalajangersagaliussapput.

§ 5. Kalaallit Nunaat palaseqarfinnut amerlassusaat angissusissaallu Naalakkersuisunit aalajangersarneqartunut aggorneqassaaq.

Imm. 2. Palaseqarfuit tamarmik palasimit oqaluffiup atuagaanik allattuisartuusumit aqunneqassapput, tak. § 15, imm. 1.

Imm. 3. Kalaallinut namminneq piumassuserinngisaminnik Danmarkimi najugaqartariaqartunut naalagiartinneqarnissamik tarnikkullu annikilliuutinik ikiorneqarnissamik neqeroorfingineqassapput.

Kapitali 3

Biskoppi provstilla

§ 6. Kalaallit Nunaata Biskoppeqarfiani Biskoppip Ilageeqarnermi qitiusumik aqutsineq allaffisornerullu siulorsornera isumagisarai biskoppeqarfimmilu provstnik, palasinik ajoqinik ilagiinnullu sinnisaasunik nakkutilliisuulluni.

Imm. 2. Biskoppitut atorfimmut atatillugu biskoppeqarfifiup allaffia pilersinneqassaaq.

Imm. 3. Ilagiit assigiinngitsut suleqatigiinneranni Biskoppi Ilagiinnut sinniisuuvoq. Tassunga tunngasunik aalajangersagassanik Naalakkersuisut aalajangersaasinnaapput.

§ 7. Biskoppimik qinersinermi qinersisinaatitaapput biskoppeqarfimmilu ilagiit sinnisaat kiisalu palasit kiffartortut, matumanittaaq palasiugallartut aamma palasit qinersinerup nalaani palasiunerminnit sulinngiffeqarallartut.

Imm. 2. Naalakkersuisut qinersinerup ingerlanneqarnissaa pillugu aalajangersagaliussapput.

§ 8. Biskoppi ilagiit siulorsorlugit sulinermini provstinit pingasunit ikiorneqassaaq: Ataaseq Avannaanut, ataaseq Kujataanut aamma ataaseq Qeqqanut Tunumullu provstinit.

Imm. 2. Qeqqanut Tunumullu provstiusoq domprovstiuvooq Biskoppimullu taartaasartuulluni.

Imm. 3. Danmarkimi kalaallinut palasi aaqqissuussaanikkut Qeqqanut Tunumullu provsteqarfimmut atavoq.

Imm. 4. Provsteqarfinni immikkuutaartuni tamani provsteqarfiup allaffia pilersinneqassaaq, taannalu provstip allaffissornikkut sulineranut ikiutissaaq.

§ 9. Ilagiit sinnisaasa inassuteqaateqareernerisigut provsteqarfiup ingerlatsineranut ukiumoortumik aningaasanut missingersuusiaq provstip suliarissavaa aalajangersakkallu Naalakkersuisunit Biskoppi isumaqatiginireerlugu aalajangersarneqartut malillugit aningaasanut atugassiissutinut akisussaalluni.

Imm. 2. Provsteqarfiup ingerlatsineranut ukiumoortumik aningaasanut missingersuusiat Biskoppimut ilisimatitsissutitut provstimit nassiuunneqassapput.

§ 10. Palasit kiffartortut ukiut allortarlugit Biskoppip palasit ataatsimiinnissaannut aggersartassavai.

Imm. 2. Palasit kiffartortut ataatsimiinnermi najuunnissaminnut pisussaatitaaffeqarput.

Imm. 3. Palasit ataatsimiinneranni palasinik ilinniartitseqqinnerit ingerlaqqillunilu ilinniartitsinerit, pikkorissarttsinerit kiisalu allaffissornikkut anersaakkullu suliassat naammassineqartareranni paasisimalikkanik paassisutissanillu tunniussueqatigiinnerit ingerlanneqartarput.

Imm. 4. Palasit ataatsimiinnerat aalajangiinissanut piginnaatitaaffiunngilaq.

§ 11. Biskoppip ukiumut ataasiarluni ataatsimiinnissamut provsttit tamaasa aggersassavai paasisutissanik tunniussueqatigiinnissaq isumasioqatigiinnissarlu siunertaralugit.

Imm. 2. Provsttit ataatsimiinnermut atatillugu provsteqarfinni ukiup ingerlasimanera pillugu nalunaarusiamik saqqummiussissapput.

§ 12. Provsttit ilagiit sinnisaannut qinersisoqareernerani provsteqarfinni tamani ataatsimeeqqaarnissamut aggersaassapput, taakkunani peqataassapput siulittaasut aamma ilagiit sinnisaanni tamani immikkuutaartuni ilaasortaq ataaseq.

Imm. 2. Provsti ilagiit sinnisaannut inatsisit atuuttut naapertorlugit pisinnaatitaaffiinnik pisussaaffiinnillu ilinniartitsissaaq. Biskoppi ataatsimeeqqaarnerni tamani peqataasinnaavoq.

Imm. 3. Provsttit ukiuni qinersiffiusuni ataatsimeeqqaarnerup qanoq ingerlanneqarnissaa pillugu Biskoppi isumaqatiginissuteqarfigissavaat.

Kapitali 4

Palasit ajoqillu

§ 13. Palasit ajoqillu maleruagassat atorfimmut atuuttut ilumooqqissaarlutik malissavaat, sulitillutilu sulinngikkaluarlutiluunniit atorfiup ataqqinassusianut tatiginassusianullu piumasarineqartut malillugit nikagisassaangitsumik pissuseqassallutik.

§ 14. Palasi ajoqilu suliassaminnik isumaginninnerminni, matumanitaaq nalunaajaanermini, tarnikkut annikilliuutinik ikiuinermini ilinniartitsinerminilu, ilagiit sinnisaannit pituttugaanngilaq.

§ 15. Palaseqarfimmi arlalinnik palaseqarsimappat palasit kiffartortut ilaat ataaseq taakku akornannit palaseqarfimmi atuagarsuarnik allattuisutut Biskoppip toqqassavaa, ukiut sisamat tikillugit atasussatut.

Imm. 2. Palaseqarfimmi palasi ataasiinnaatillugu, taassuma atuagarsuarnut allattuineq isumagissavaa.

Imm. 3. Palasip atuagarsuarnik allattuisup akisussaaffigaa palaseqarfimmi allaffissorneq pingartumillu atuagarsuit allattuiffigineqarnissaat, ilagiinni suliassat aaqqissuunneqarnerat, matumanitaaq naalagiarnerit palasit akornanni agguataarnissaat, piareersimasut piffissalersornerisa aalajangersarneqarnerat aamma aningaasanik aqtsineq.

Imm. 4. Naalakkersuisut Biskoppi isumaqtigiinniareerlugu palaseqarfiput ingerlatsinissaa pillugu aalajangersagaliussapput.

Kapitali 5

Ilagiit sinnisaat

§ 16. Ilagiit sinnisaanni ilaasortaapput ilagiit sinnisaattut qinikkat kiisalu sumiiffimmi ajoqi ajoqilluunniit aamma palasi palasilluunniit kiffartortut sumiiffimmi tassani najugaqartut.

Imm. 2. Ilasortat qinikkat amerlassusaat tamatigut palasit ajoqillu amerlassusaannit amerlanerujuannassapput, taamaangnippallu ajoqi kingulliulluni atorfinittoq peerneqartassaaq. Taannali ilagiit sinnisaasa ataatsimiinneranni peqataasinnaatitaavoq, taasisinnaatitaananili.

Imm. 3. Palasit kiffartortut palaseqarfimmi najugaqarfingisaminni tamarmiusuni taasisinnaatitaanatik ilagiit sinnisaasa ataatsimiinneranni peqataasinnaatitaapput.

Imm. 4. Provsti provsteqarfimmi tamarmiusumi taasisinnaatitaanani ilagiit sinnisaasa ataatsimiinneranni peqataasinnaatitaavoq.

Imm. 5. Biskoppi biskoppeqarfimmi tamarmiusumi taasisinnaatitaanani ilagiit sinnisaasa ataatsimiinneranni peqataasinnaatitaavoq.

§ 17. Qinersinerup kinguninnguatigut palasip atuagarsuarnik allattuisup imaluunniit sumiiffimmi ajoqip sulissutiginninneratigut ilagiit sinnisaat ataatsimiissapput qinersillutillu siulittaasumik, siulittaasup tullianik allatsimillu ukiumi ataatsimi atasussanik. Tamatuminnga nalunaarut aamma ilaasortanut tamarmiusunut kiisalu ilaasortatut qinigaasut sinnisussaannut nalunaarsuiffik palasimit atuagarsuarnik allattuisumit provstimut Biskoppimullu nassiunneqassapput.

Imm. 2. Ilagiit sinnisaat ukiumut minnerpaamik marloriarlutik ataatsimiittassapput aammalut minnerpaamik ilaasortap ataatsip tamanna piumasarippagu.

Imm. 3. Taasineq aalajangerneqartassaaq taasisut nalinginnaasumik amerlanerussuteqarnerat naapertorlugu. Ilagiit sinnisaat ataatsimiinnermi aalajangiisinnaassuseqarput ilaasortat minnerpaamik affaat najuuppata. Taasinerit naligiippata siulittaasup taasinera aalajangiisuuvooq.

Imm. 4. Ilagiit sinnisaasa suleriaasissartik namminneq aalajangersassavaat.

§ 18. Ilagiit sinnisaasa ataatsimiinnerat allattaavinnut allattorneqartassapput.

Imm. 2. Allattaavinni allassimassapput qanga sumilu ataatsimiittoqarnera, kina ataatsimiinnermi najuunnersoq, apeqqutit suut oqaluuserineqarsimanersut kiisalu aalajangiinerit suut pisimanersut.

Imm. 3. Ilaasortap kialuunniit nammineq isummani allaasoq allattaavinnut naatsumik ilanngutitissinnaavaa.

Imm. 4. Allattaavik siulittaasumit allatsimillu atsiorneqarsimassaaq ataatsimiinnermilu tulliuttumi akuersissutigisassatut saqqummiunneqassalluni. Allattaaviup akuerisaasup assilinera provsttimut ilisimatitsissutitut nassiunneqassaaq.

§ 19. Ilagiit sinnisaasa aalajangissavaat ilaasortat ilaat suliami ima soqutigisaqartiginersoq sinniisut oqaluuserinninneranni taassisutiginninnerannilu peqataasinnaanani.

Imm. 2. Ilaasortap suliap oqaluuserineqarnerani peqataasinnaanerminut nalornissutaalersinnaasunik peqarnini ilagiit sinnisaannut nalunaarutigissavaa.

§ 20. Ilagiit sinnisaasa palaseqarfimmi oqaluffit illutaat toqusullu inaat aalajangersakkat Naalakkersuisunit aalajangersarneqartut malillugit nakkutigissavaat. Taakku isumannaatsumik aserfallatsaalinissaat provstip isumagissavaa.

Imm. 2. Init naalagiartarfittut atorneqartut (atuarfiit naalagiartarfiuutigisut) nakkutigineqarnerat kommunip ataatsimiitaliaa susassaqartoq suleqatigalugu pissaaq.

§ 21. Ilagiit sinnisaasa oqaluffinnik toqusullu inaannik sananissamut, aaqqissornissaannut, aserfallatsaaliornissaannut pinnersarnissaannullu kiisalu init naalagiartarfittut atorneqartut (atuarfiit naalagiartarfiuutigisut) aaqqissornissaannut pinnersarnissaannullu siunnersuutit provsttimut saqqummiutissavaat.

Imm. 2. Siunnersuutit ilagiit sinnisaasa saqqummiussaat taakku piumasaqarneratigut Biskoppimut Naalakkersuisunullu saqqummiunneqassapput.

§ 22. Ilvangiliup nalunaajaatigineqarnissaata periarfissagissaarnissaa ilagiit sinnisaasa pisussaaffigaat.

§ 23. Ilagiit sinnisaasa palasimut atuagarsuarnut allattuisumut nalunaarnermikkut makku aalajangiiffigissavaat

- 1) naalagiarnernut aalajangersimasunut piffissaq atugassaq,
- 2) tussiuitit nutaat aamma tussiuitit tapiisa akuerisaasut atulersinnissaat,
- 3) palaseqarfimmi palasip atuagarsuarnik allattuisup inassuteqaateqarnera malillugu ulloq apersortitsivissaq pissutsillu allat apersortitsinermut tunngasut, aamma
- 4) ilagiinni suliniutit soorlu biibililerineq, meeqlanik inuuusuttunillu sammisaqarneq, oqalugiartitsinerit, diakonitut sulineq suliniutillu assingusut aallartinneqarnissaat.

Imm. 2. Palasi ajoqiluunniit ilagiit sinnisaannit akuerineqassapput

- 1) naalagiarnerni aalajangersimasuni katersuiniartoqarnissaanut, aamma
- 2) naalagiarnerni aalajangersimasuni imaluunniit ilagiinnut tunngasunik suliaqarnerni naalagiarnermi ileqqorisassanik allanik imaluunniit ritualinik allanik akuerineqarsimasunik siornatigut ilagiinni atorneqartarsimasunit allaasunit atuinissamut.

Imm. 3. Palasi ajoqiluunniit ilagiit sinnisaannit Biskoppimillu akuerineqassapput naalagiarnerni aalajangersimasuni imaluunniit ilagiinnut tunngasunik suliaqarnerni naalagiarnermi ileqqorisani imaluunniit ritualinilu allannguuteqalaartitsisoqassappat imaluunniit tussiuitit tussiutillu tapii akuerisaasunit allaanerusut atorneqassappata.

Imm. 4. Apeqqutit suulluunniit ilagiinni sulinermut tunngasut sukumiinerusumik misissugassatut isumaliutigisassatullu piukkunnartut ilagiit sinnisaasa palaseqarfimmi palasi atuagarsuarnik allattuisoq aqqutigalugu Biskoppimut provstimullu saqqummiussinnaavaat.

Kapitali 6 *Ilinniartitaanerit*

§ 24. Biskoppip palasinik, ajoqinik pattattunillu ilinniartitseqqinnerit ingerlaqqillunilu ilinniartitsinerit isumagisarai.

Imm. 2. Naalakkersuisut palasinik, ajoqinik pattattunillu ilinniartitseqqinnerit ingerlaqqillunilu ilinniartitsinerit pillugit aalajangersakkanik, biskoppi isumaqtiginiareerlugu aalajangersaasinnaapput.

§ 25. Biskoppip isumagisaraa ajoqinik ilinniartitsineq, naalagiartitsinermi aamma ilagiinnut tunngasuni suliaqarnermi, allattukkanik atuaanermi, oqaluttuareqqiinermi allatullu saqqummiussinermi piginnaasassanik ilinniartup pissarsisinneqarnissaanik siunertaqartoq, taamaalliluni ajoqi suliamut ilisimasaqarluni akisussaassuseqarlunilu ilagiinnut inuiaqatigiinnullu tunngatillugu kiffartornermini isumaginnissinnaasunngorlugu.

Imm. 2. Naalakkersuisut ajoqinik ilinniartitsineq, matumanittaaq pikkorissaanermut ataatsimiitaliaq, ilinniartussatut tiguneqarnissamut piumasaqaatit aamma ilinniartitaanerup imarisai annertussusaalu kiisalu ilinniarsimanermut upernarsaatit pillugit aalajangersaasinnaapput.

§ 26. Biskoppip isumagisaraa pattattunik ilinniartitsineq, piginnaaneqarfialugu pattattutut kiffartornerup, allatigullu ilagiinni nipilersornermi, matumanittaaq erinarsoqatigiinnik siulersuinermi, suliani piginnaasassanik ilinniartup pissarsisinneqarnissaanik siunertaqartoq. Ilinniartitaaneq illoqarfinni nunaqarfinnilu naalagiarnermi nipilersorteqarnerup siuarsaavagineqarneranut iluaqtaassaaq. Ilinniartitaanermi pingarnersaavoq ilagiinni nipilersornissamut tunngasut.

Imm. 2. Naalakkersuisut pattattunik ilinniartitsineq, matumanittaaq pikkorissaanermut ataatsimiitaliaq, ilinniartussatut akuerineqarnissamut piumasaqaatit, ilinniartitaanerup imarisai annertussusaalu kiisalu ilinniarsimanermut upernarsaatit pillugit aalajangersaasinnaapput.

Kapitali 7 *Aalajangersakkat assiginngitsut*

§ 27. Naalakkersuisut ilagiit sinnisaanni qinikkatut ullormusiaqartinnissaat, angalanermut najugaqarnermullu aningaasartuitinut taartisiaqartinnissaat kiisalu sulitilluni akissarsiassaraluanik annaasaqarnermut taartisisarnissaat pillugu aalajangersagaliussapput

§ 28. Ilagiit sinnisaasa palasillu aalajangigaat aalajangiinermit sapaatip-akunneri 4-at qaangiutsinnagit provstimut naammagittaalliuutigineqarsinnaapput.

Imm. 2. Provstit aalajangigaat aalajangiinermit sapaatip-akunneri 4-at qaangiutsinnagit Biskoppimut naammagittaalliuutigineqarsinnaapput.

Imm. 3. Biskoppip aalajangigaat aalajangiinermit sapaatip-akunneri 4-at qaangiutsinnagit Kultureqarnermut, Ilinniartitaanermut, Ilisimatusarnermut Ilageeqarnermullu

Naalakkersuisoqarfimmut naammagittaalliuutigineqarsinnaapput. Naalakkersuisoqarfíup aalajangiineri inaarutaapput.

Kapitali 8 *Atuutilersitsineq*

§ 29. Inatsisartut inatsisaat ulloq 1. august 2010 atuutilerpoq.

Imm. 2. Peqatigisaanik Ilageeqarneq pillugu Inatsisartut peqqussutaat nr. 15, 28. oktober 1993-imeersoq, aamma provsteqarfínni ataatsimiititalianut il.il. qinersisarneq pillugu Namminersornerullutik Oqartussat nalunaarutaat nr. 30, 27. juni 1994-imeersoq atorunnaarsinneqarput.

Imm. 3. Aalajangersakkat Inatsisartut peqqussutaat imm. 2-mi taaneqartoq naapertorlugu aalajangiunneqartut imaluunniit atuutsinneqartut atortuuinnassapput inatsisartut peqqussutaat manna inatsisartulluunniit peqqussutaat allat malillugit allamik taarserneqarnissamik imaluunniit atortuujunnaarsinneqarnissamik tungaanut.

§ 30. Provsteqarfínni ataatsimiititaliat 1. august 2010-mi atuukkunnaassapput.

Imm. 2. Ilagiinni atorfinitssisarnerit pillugit Inatsisartut peqqussutaanni nr. 8, 30. oktober 1998-imeersumi § 11-mi, imm. 2-mi ”provsteqarfínni ataatsimiititaliat” taarserneqassaaq uuminnga ”ilagiit sinnisaat”.

§ 31. Atuutilersitsinerup kinguninnguatigut palasinik atuagarsuarnik allattuisunik nutaanik toqqaasoqassaaq, tak. § 15, imm. 1. Palasit atortuulersitsinerup nalaani pisortaaasut palaseqarfímmi palasit allat assigalugit palasitut atuagarsuarnik allattuisutut qinerneqarsinnaapput.

Namminersorlutik Oqartussat, ulloq xx.xx. 2010

Kuupik Kleist

/

Mimi Karlsen